

LA USC DI LADINS – VENERDI' 5 MAGGIO 2017

## Ai 5 de mé 1920 l'é nasciù la bandiera ladina

Meté fora noscia bandiera te chesta ocajon emportanta *Depiù a piata 3*



*La bandiera dai 3 colores, simbol emportant per duc i ladins de la Dolomites.*

# Ai 5 de mé 1920 l'é nasciù la bandiera ladina

Meté fora noscia bandiera te chesta ocajon emportanta

va inant da la pruma plata

Lé i 5 de mé 1920 e sun jout de Freia se bina na setantina de ombolc e aministradores de la 5 valèdes ladines per meter jù n document da manèr al goern e a l'autoritèdes taliènes e de la Region.

I domana l'recognosciment ofizial de grupa ladina, no taliegn no todesc, e l'ert de autodeterminazion e n referendum populèr per domanèr che duc i ladins reste adum te na soula provinzia.

E te chela ocajon l'é nasciù la bandiera ladina con trei fasces: l'brun-celestin del ciel, l'bianch de nesc crepes de dolomia e corii da la neif e l'vert di pré, de la pastures e di bosé.

Enlouta l'é stat manà n telegram a nesc jormegn romances di Grijons, per ge dir n fort deelpai per l'didament abù te chi senestres prumes tempes dò la vera, del 1918 e 1919, e per domanèr amò inant n aiut de carater politic e diplomatic. I Romances i aea da egn n recognosciment ofizial da la Confederazion Helvetica.

L'é stat dezidù de endrezèr desvaliva manifestazions te la valèdes e foradecà. La delegazion fascèna à dezidù de endrezèr la scontrèdes a Busan. Da pèrt de Fascia vegnia domanà l'union al Sudtiroi a la Provinzia de Busan, ajache i era stac spartii 100 egn dant, del 1818, i metan col Zircol de Trent.



La bandiera de l'Union di Ladins coi bie colores brun, bianch e vert.

Te l'endunèda - e no l'é stat la soula te chi ries tempes dò la fin de la pruma vera - l'é stat tout sù dut per dut la idees de l'Union Ladina/Ladinerverein metuda sù a Dispruch del 1905 co l'obietif de meter adum aministrativamenter e politicamenter duc i ladins.

L'é stat lità desche president Leo Demetz che l'é jit de fata ti Grijons per studièr e tor sù l'endrez di Romances.

I program l'era scempie e dò 100 egn amò atual: autonomia per i ladins;

defendura del lengaz, de la cultura e de la tradizions che doventèa automaticamenter defendura de l'economia del popul ladin.

Te chesta ocajon emportanta anché, 5 de mé 2017 meton fora nosc simbol, noscia bandiera. Se pel la troèr te la sentes de la Unions di Ladins de valèda e a Ortije te senta de l'Union Generela, te Cèsa di Ladins.

*Fernando Brunel, president de l'Union di Ladins de Fascia*